



Umuryango
w'Abibumbye

**Urukiko Mpanabyaha Mpuzamahanaga
Rwashyiriweho u Rwanda**

Ibiro bya Porokireri
Amahoro Hotel, P.O.Box 749, Kigali, Rwanda
Fax: +1-212-963-4001 - Tel.: +250-84266 or +1-212-963-9906

Urubanza N° ICTR-2005-88-I

Umwimerere: Igifaransa

POROKIRERI

ABURANA NA:

CALLIXTE KALIMANZIRA

INYANDIKO Y'IBIREGO

Yatanzwe ku itariki ya 21 Nyakanga 2005

I. Porokireri w’Urukiko Mpanabyaha Mpuzamahanga Rwashyiriweho u Rwanda, ashingiye ku bubasha ahabwa n’ingingo ya 17 ya Sitati y’Urukiko Mpanabyaha Mpuzamahanga Rwashyiriweho u Rwanda (« Sitati y’Urukiko »), arega:

Callixte Kalimanzira ibyaha bikurikira :

- I. **JENOSIDE**, hashingiwe ku ngingo ya 2(3)(a) n’iya 6(1) za Sitati; cyangwa, icyo cyaha kiramutse kitamuhanye, amurega,
- II. **KUBA ICYITSO CY’ABAKOZE JENOSIDE**, hashingiwe ku ngingo ya 2(3)(e) n’iya 6(1) za Sitati;
- III. **GUHAMAGARIRA ABANTU MU RUHAME KANDI KU BURYO BUTAZIGUYE GUKORA JENOSIDE**, hashingiwe ku ngingo ya 2(3)(c) n’iya 6(1) za Sitati.

II. UREGWA

1. **Callixte Kalimanzira** yavukiye muri Komine ya Muganza, Perefegitura ya Butare, mu Rwanda, mu mwaka wa 1953. Afite impamyabumenyi ihanitse mu by’ubuhinzi kandi yagiye agira imyanya ikomeye inyuranye mu buyobozi bwa Leta.
2. Igihe ibivugwa muri iyi Nyandiko y’ibirego byabaga, Callixte Kalimanzira yari icyegera cya Perezida Théodore Sindikubwabo na Minisitiri w’Intebe Jean Kambanda, kubera ko bakomokaga mu ntara imwe, kandi we na Perezida Sindikubwabo bakaba bari mu ishyamba rimwe rya politiki. Byongeye kandi, yari umwe mu bantu bake cyane bakomokaga muri iyo ntara bari abakozi bakuru ba Leta.

Yabaye umukozi mukuru wa Leta mu myanya ikurikira:

- (i) Superefe i Butare n’i Byumba;

- (ii) Umuhuzabikorwa w'inzego zishinzwe ubuhinzi muri Perefegitura ya Kigali;
- (iii) Umuyobozi w'Ishami rishinzwe amajyambere y'icyaro muri Perezidansi ya Repubulika;
- (iv) Umunyamabanga Mukuru muri Minisiteri y'Ubutegetsi bw'Igihugu;
- (v) Umuyobozi w'Ibiro bya Minisitiri muri Minisiteri y'Ubutegetsi bw'Igihugu, akaba yaragumye kuri uwo mwanya muri Guverinoma y'agateganyo. Hagati y'itariki ya 6 Mata n'ya 25 Gicurasi yari umusimbura wa Minisitri w'Ubutegetsi bw'Igihugu;
- (vi) Umuyoboze ukomeye w'ishyaka rya MRND; kandi
- (vii) kubera ibyo, muri Perefegitura ya Butare, yari afite ububasha yakomoraga ku mategeko kuri ba burugumesitiri, abakonseye ba segiteri, abayobozi ba serire, ba nyumbakumi, abakozi bo mu nzego z'ubutegetsi, abajandarume, abapolisi ba komine, Interahamwe, abantu bitwaraga gisirikare n'abasiviri, kubera ko yashoboraga gutegeka abo bantu gukora cyangwa kudakora ibikorwa binyuranyije n'amategeko, kandi akaba yarashoboraga kubafatira ibyemezo ku birebana na disipuline cyangwa kubahanira ibyo bakoze binyuranyije n'amategeko cyangwa ibyo bateshutse gukora.

III. IBIREGO N'INCAMAKE Y'IBYABAYE

3. Perefegitura ya Butare iri mu majyepfo y'u Rwanda ikaba ihana umupaka n'u Burundi. Mu mwaka wa 1994, yari izwiho kuba ituwe n'Abatutsi benshi. Mu rwego rwa politiki, yari indiri y'Ishyaka ryo kwishyira ukizana (*PL*) ritavugaga rumwe na MRND. Ibyo biri mu byabujije Interahamwe kuhashinga imizi. Mu ntangiriro za Mata, Perefefe wayo Jean Baptiste Habyarimana, wari Umututsi akaba n'umuyoboze wa PL, yarwanyije ubwicanyi ku mugaragaro.

4. Mu gihe ibivugwa byose muri iyi Nyandiko y'ibirego byabaga, mu Rwanda hari itsinda ry'abantu nyamuke bari bagize ubwoko bw'Abatutsi, kandi Ubutegetsu bwo mu Rwanda bwabafataga gutyo ku buryo buzwi. Abenshi mu baturage bari abo mu bwoko bw'Abahutu kandi na bo Ubutegetsu bwo mu Rwanda bwabafataga gutyo ku buryo buzwi.
5. Hagati y'itariki ya 6 Mata n'ya 17 Nyakanga 1994, mu Rwanda hose, by'umwihariko muri Perefegitura ya Butare, Interahamwe, abapolisi ba komine, abajandarume, abasirikare bo mu ngabo z'u Rwanda (FAR) n'abasiviri bitwaje intwari bagabye ibitero byibasiye abaturage b'abasiviri babonaga ko ari Abatutsi cyangwa ko bashyigikiye Abatutsi. Muri ibyo bitero, bamwe mu baturage b'Abanyarwanda bishe abantu bakekwagaho kuba Abatutsi, cyangwa babatera bikomeye ubumuga bubazahaza umubiri cyangwa mu mutwe. Ibyo bitero byahitanye abantu benshi byabonaga ko ari abo mu bwoko bw'Abatutsi.

IKIREGO CYA 1: JENOSIDE

Porokireri w'Urukiko Mpanabyaha Mpuzamahanga Rwashyiriweho u Rwanda arega **Callixte Kalimanzira** icyaha cya **jenocide** giteganywa n'ingingo ya 2(3)(a) ya Sitati, kubera ko hagati y'itariki ya 1 Mutarama 1994 n'ya 31 Ukuboza 1994, **Callixte Kalimanzira** yagize uruhare mu bwicanyi bwakorewe Abatutsi cyangwa mu bikorwa bikomeye byabateye ububabare bwabazahaje umubiri cyangwa mu mutwe, agamije kurimbura abantu bose bo muri ubwo bwoko cyangwa se igice cyabo bazira icyo bari cyo.

Cyangwa, icyo cyaha kiramutse kitamuhanye, amurega:

IKIREGO CYA 2: KUBA ICYITSO CY'ABAKOZE JENOSIDE

Porokireri w'Urukiko Mpanabyaha Mpuzamahanga Rwashyiriweho u Rwanda arega **Callixte Kalimanzira** icyaha cyo kuba icyitso cy'abakoze jenoside giteganywa n'ingingo ya 2(3)(e) ya Sitati, kubera ko hagati y'itariki ya 1 Mutarama 1994 n'iya 31 Ukuboza 1994, **Callixte Kalimanzira** yabaye icyitso mu bwicanyi bwakorewe Abatutsi cyangwa mu bikorwa byabateye ububabare bwabazahaje umubiri cyangwa mu mutwe, agamije kurimbura abantu bose bo muri ubwo bwoko cyangwa se igice cyabo bazira icyo bari cyo.

INCAMAKE Y'IBYABAYE BIREBANA N'IKIREGO CYA 1 N'ICYA 2

Uburyozwacyaha nka gatozi

6. Hashingiwe ku ngingo ya 6(1) ya Sitati, **Callixte Kalimanzira** aryoza nka gatozi icyaha cyo gukora jenoside cyangwa icyo kuba icyitso cy'abakoze jenoside kubera ko yacuze umugambi wo gukora ibyaha, yahamagariye kandi yategetse abantu kubikora, na we ubwe yarabikoze cyangwa, ku bundi buryo ubwo ari bwo bwose, yafashije kandi yashishikariye mu kubicurira umugambi, mu kubitegura cyangwa se mu kubitsotsoba. Byongeye kandi, **Callixte Kalimanzira**, yifashishije umwanya yarimo nk'uko bivugwa haruguru mu cyiciro cya II (cyiswe «Uregwa»), yahamagariye kandi yategetse abo yari akuriye gukora ibyaha bivugwa muri iyi Nyandiko y'ibirego. Ibikorwa bishingirwaho mu kumuryoza icyaha nka gatozi bisobanuye ku buryo burambuye hano hasi kuva ku gika cya 7 kugeza ku cya 17.

Kuba Uregwa yarageze muri Perefegitura ya Butare kandi akayikoramo ingendo hirya no hino nyuma y'itariki ya 6 Mata 1994 ahamagarira abantu gukora jenoside ndetse anayiyobora

7. Mu rwego rwo gutangiza ubwicanyi bwibasiye Abatutsi muri Perefegitura ya Butare, Perezida Sindikubwabo, aherekejwe n'abategetsi benshi bari muri Guverinoma y'agateganyo, yasuye Butare ku tariki ya 19 Mata 1994 kugira ngo ahamagarire abaturage gukora jenoside. Kubera ko Minisitiri w'Ubutegetsi bw'Igihugu atari ahari, **Callixte Kalimanzira** wari Umuyobozi w'Ibiro bya Minisitiri muri Minisitiri y'Ubutegetsi bw'Igihugu ni we wayoboze gahunda muri iyo nama yahujye abayobozi bo muri Guverinoma y'agateganyo n'abaturage. Yahaye ijamba abayijemo bahamagariye abaturage kwica Abatutsi nk'uko byari byatangiyeho gukorwa mu zindi perefegitura. Amagambo rutwitsi yavuzwe muri iyo nama n'abari bagize Guverinoma y'agateganyo, kandi **Callixte Kalimanzira** atigeze yamagana, yabaye imbarutso y'ubwicanyi bwahitanye Abatutsi babarirwa mu bihumbi muri Perefegitura ya Butare. Bityo, **Callixte Kalimanzira** yafashije kandi yashishikariye abantu gukora ubwicanyi bwakurikiyeho bwibasiye Abatutsi.
8. Hagati ya Mata n'igice cya mbere cya Nyakanga 1994, **Callixte Kalimanzira** yagiye i Butare inshuro zinyuranye ari kumwe n'abategetsi bakuru bo muri Guverinoma y'agateganyo barimo Perezida Théodore Sindikubwabo, Minisitiri w'Intebe Jean Kambanda na Minisitiri w'Umuryango n'Iterambere ry'abali n'abategarugori, Pauline Nyiramasuhuko, n'abayobozi bakuru bo muri ako karere nka Perefegitura Alphonse Nteziryayo na ba ofisiye bakuru bo mu Ngabo z'u Rwanda (FAR) barimo Tharcisse Muvunyi. icyari kigamijwe muri izo ngendo **Callixte Kalimanzira** yagiyemo, kwari ugukangurira abaturage politiki ya Guverinoma no kubahamagarira kwica Abatutsi. Kubera ibyo, muri Perefegitura ya Butare hishwe Abatutsi babarirwa mu bihumbi.

Kuba **Callixte Kalimanzira** yaragize uruhare mu bwicanyi bwabereye ku gasozi ka Kabuye, muri Komine ya Ndora, Segiteri ya Gisagara.

9. Hafi y'itariki ya 23 Mata 1994, abasiviri b'Abatutsi babarirwa mu bihumbi bateraniye ku gasozi ka Kabuye kari muri Komini ya Ndora. **Callixte Kalimanzira** ubwe yabashishikarije guhungira kuri ako gasozi abizeza ko bazarindwa bagahabwa n'ibiribwa. Aho kurindwa, bagabweho igitero n'Abahutu maze baricwa, **Callixte Kalimanzira** abizi kandi abireba. Ndetse **Callixte Kalimanzira** ubwe yashakishije abapolisi ba komine n'abasirikare bo kongerera igitero ingufu. Ku gasozi ka Kabuye haguye Abatutsi babarirwa mu bihumbi.
10. Hafi y'itariki ya 23 Mata 1994, ubwo ku gasozi ka Kabuye hagabwaga ibitero, **Callixte Kalimanzira** n'abayobozi bo muri ako gace barimo Dominique Ntawukuriryayo wari Superefe, Fidèle Uwizeye, na Bernadette Mukarurangwa wari Depite, baganiriye ku migendekere y'ubwicanyi bwabereye kuri ako gasozi, icyo gihe bakaba bari imbere yo kwa Burugumestiri Fidèle Uwizeye. Bamaze kubona ko abagabye igitero batabashije gutsemba abantu bose bari bateraniye ku gasozi ka Kabuye kubera ko bari benshi cyane, bafashe icyemezo cyo kujya kugenzura uko byifashe kuri ako gasozi. Bityo, **Callixte Kalimanzira** ubwe yagenzuye ibitero byagabwe ku Batutsi bari bateraniye ku gasozi ka Kabuye, byahitanye ababarirwa mu bihumbi.

Kuba Callixte Kalimanzira yaragize uruhare mu bwicanyi bwabereye kuri bariyeri yari ku mugezi witwa Buzana no ku bwabereye mu i Rango

11. Hafi y'impera za Mata 1994, **Callixte Kalimanzira** yajyanye Abatutsi bagera ku ijana barimo abagore, abagabo n'abana kuri bariyeri yari ku mugezi witwa Buzana, aho Komine ya Ngoma n'iya Nyaruhengeri zihurira. Icyo gihe **Callixte Kalimanzira** yari kumwe na Koloneli Tharcisse Muvunyi na Koloneli Alphonse Nteziryayo baherekejwe n'abasirikare babarindaga. Benshi mu Batutsi bajyanyweyo bari bafite ibikomere bikomeye ku mubiri, by'umwihariko ku dutsinsino. **Callixte Kalimanzira** yafashe

icyemezo ko Abatutsi batari bagifite imbaraga zo gukomeza urugendo bagomba kwicirwa aho kuri bariyeri, anatanga itegeko ko abandi bajya kubicira mu Irango ku birometero bike uvuye kuri iyo bariyeri. **Callixte Kalimanzira** yayoboye igikorwa cyo kwica Abatutsi bari bananiwe cyane batagishoboye gukomeza urugendo. Ndetse ubwe hari Abatutsi yahondaguye kugeza bavuyemo umwuka. Abatutsi bari basigaye bajyanywe mu Irango aho abagera kuri 50 muri bo biciwe, bitegetswe na we.

Ibindi bikorwa byo guhamagarira abantu kwica Abatutsi kandi byakurikiwe n'ubwicanyi

12. Hafi y'itariki ya 5 Kamena 1994, **Callixte Kalimanzira** yagiye kuri Santere ya Gasagara, muri Segiteri ya Muganza, ari kumwe na Koloneli Tharcisse Muvunyi n'abasirikare, ahamagarira abaturage kwica Abatutsi bataretse n'abari bakiri mu nda za ba nyina. Nyuma yaho, ari ku biro bya Komine ya Gikondo [sic], yabwiye ijamba abari aho avuga ko Abatutsi bose bari bakiriho, harimo abagore, abakobwa, abasaza n'abana bagombaga kwicwa. Kubera ayo magambo yo guhamagarira abantu kwica abandi, abagore n'abakobwa barishwe koko.
13. Mu ntangiriro za Gicurasi 1994, Callixte Kalimanzira yahagaze kuri bariyeri yari muri Segiteri ya Kibilizi maze abwira abayicungaga ko bagomba guhiga Abatutsi mu ibanga ngo kubera ko hari abanyamahanga bakurikiranaga ibyarimo kubera mu Rwanda. Yanabategetse kurimbura amazu yose y'Abatutsi, bakanasibanganya ibisigisigi byayo byose, no kubwira Abatutsi ko amahoro yagarutse kugira ngo bave mu bwihisho.
14. Hafi y'itariki ya 5 Kamena 1994, **Callixte Kalimanzira** yafashe ijamba imbere y'abaturage b'Abahutu bari ku biro bya Komine ya Gikondo [sic], ateguka ko Abatutsi bose bakiriho bicwa, harimo abagore, abakobwa, abasaza n'abana ngo kubera ko *FPR* iramutse itsinze urugamba bashobora kuzaba abatangabuhamya bo gushinja abakoze ubwicanyi. Iyo nama ikirangira, abakecuru babiri n'abakobwa umunani barishwe, ari bo: Mukamazimpaka, Nyaraneza Salafina, Mukaruyonza na nyina, Nyaramisago, Goretha Umubeyeyi, Anasthasia Nakabonye, Apolinarai, n'abakobwa babiri ba Kimonyo. Na

none kandi, abana b'Abatutsi babarirwa hagati ya 10 na 15 nabo bishwe kubera itegeko **Callixte Kalimanzira** yari yahaye abaturage b'Abahutu.

Guhamagarira abantu gushyiraho bariyeri, kugenzura za bariyeri, no guhamagarira abaturage gufata intwara kugira ngo bice Abatutsi

15. Guhera hagati muri Mata kugeza mu mpera za Nyakanga 1994, **Callixte Kalimanzira** yahamagariye abaturage gushyiraho za bariyeri kugira ngo bice Abatutsi. Akenshi, ubwe yabaga ari kuri izo bariyeri kugira ngo agenzure uko zikora. Abatutsi benshi biciwe kuri izo bariyeri zari zashyizweho bitegetswe na **Callixte Kalimanzira** kandi ari na we uzigenzura.

Uruhare rwa Callixte Kalimanzira mu itangwa ry'intwara

16. Perezida Juvénal Habyarimana amaze iminsi ibiri apfuye, **Callixte Kalimanzira** yagiye muri Komine ya Kigembe mu modoka yarimo isanduku yuzuye imipanga, ayiha Bonaventure Nkundabakora anamwibutsa ko yujuje isezerano yari yamuhaye ryo kumuzanira intwara. Iyo mipanga yatanzwe na **Callixte Kalimanzira** yakoreshejwe mu kwica Abatutsi. Na none kandi, **Callixte Kalimanzira** yagemuraga buri gihe intwara zifite ubugi ku biro bya Komine ya Muganza zigashyirwa mu bubiko bw'intwara bwari buhari. Izo ntware zakwirakwijwe mu abaturage bihagarariwe na **Callixte Kalimanzira** kandi zakoreshejwe mu kwica Abatutsi.

Uruhare rwa Callixte Kalimanzira mu myitozo yo gukoresha intwara yahawe abaturage

17. Muri Gicurasi 1994, ku kibuga cy'umupira w'amaguru cyo muri Komine ya Muganza habereye ikoraniro ryari rigamije kwigisha abaturage gukoresha intwara. **Callixte Kalimanzira**, Chrysologue Bimenyimana wari Burugumesitiri wa Komine ya Muganza, na Alphonse Nteziryayo wari Perefefe wa Perefegitura ya Butare bakaba bari muri iryo koraniro. **Callixte Kalimanzira** ubwe yeretse abari mu nama uburyo barashisha

umuheto. Abaturage bigishijwe gukoresha intwari bihagarariwe na **Callixte Kalimanzira** bagize uruhare mu bwicanyi bwibasiye Abatutsi muri ako karere nyuma y'icyo gihe.

IKIREGO CYA 3: GUHAMAGARIRA ABANTU MU BURYO BUTAZIGUYE
KANDI MU RUHAME GUKORA JENOSIDE

Porokireri w'Urukiko Mpanabyaha Mpuzamahanga Rwashyiriweho u Rwanda arega **Callixte Kalimanzira icyaha cyo guhamagarira abantu mu buryo butaziguye kandi mu ruhame gukora jenocide**, giteganywa n'ingingo ya 2(3)(c) ya Sitati y'Urukiko, kubera ko, hagati y'itariki ya 1 Mutarama 1994 n'ya 17 Nyakanga 1994, yahamagariye abantu mu ruhame kandi mu buryo butaziguye gukora ubwicanyi bwibasiye Abatutsi no kubateza ububare bukomeye bubazahaza umubiri cyangwa mu mutwe, hagamijwe kurimbura abagize ubwo bwoko bose cyangwa se igice cyabo bazira icyo bari cyo. Mu bantu yahamagariye gukora ibyo byaha, harimo abayobozi bo mu karere, abapolisi ba komine, Interahamwe, abajandarume, abasirikare n'abasiviri.

INCAMAKE Y'IBYABAYE BIREBANA N'IKIREGO CYA 3

Uburyozwacyaha nka gatozi

18. Hashingiwe ku ngingo ya 6 (1) ya Sitati, **Callixte Kalimanzira** ariyozwa nka gatozi kuba yarahamagariye abantu mu buryo butaziguye kandi mu ruhame gukora jenocide kubera ko yakanguriye abantu gukora icyo cyaha, yacuze umugambi wacyo, yategetse abandi kugikora kandi na we ubwe yaragikoze, cyangwa se ku bundi buryo ubwo ari bwo bwose yafashije kandi yashishikariye abantu mu gucura umugambi w'icyo cyaha, mu kugitegura cyangwa mu kugitsotsoba. Ibikorwa bishingirwaho mu kumuryoza icyaha nka gatozi bisobanuye ku buryo burambuye hano hasi kuva ku gika cya 19 kugeza ku cya 27.

19. Hafi y'impera za Werurwe 1994, abategetsu bo mu karere bakoreye inama muri Serire ya Nyamigango, Segiteri ya Gisagara, Komine ya Ndora (kuri santere y'ubucuruzi ya Gisagara). Muri iyo nama, **Callixte Kalimanzira** yafashe ijamba ahamagarira abaturage gufata intwari kugira ngo bitegure kurwanya « umwari ». Yashishikariye kandi abari gukora ibikoresho gakondo kubikora, anizeza abaturage kuzabaha imbunda.
20. Hafi y'itariki ya 9 Mata 1994, hari inama yabereye muri Serire ya Kanage, Segiteri ya Mukindo, Komine ya Kibayi. Muri iyo nama, **Callixte Kalimanzira** yabwiye impunzi z'Abarundi ko Guverinoma y'agateganyo ibizera, ko Perezida Juvénal Habyarimana yari yarabitayeho kandi ko na Perezida Sindikubwabo azabigenza atyo, anababwira ko umwari waburukanye mu Burundi ari we wishe Perezida Habyarimana na Perezida Ntaryamira. Yakomeje abinginga ngo ntibazasohoke mu gihugu, ababwira ko icyari cyamuzanye kwari ukubazanira intwari gakondo zo kwirwanaho bahangana n'« umwari ».
21. Ahagana hagati muri Mata 1994, **Callixte Kalimanzira** yagiye kuri bariyeri yitwaga iya *Jaguar* yari imbere ya kiliziya y'Abagatorika yo ku Gisagara ari kumwe n'abasirikare batatu maze aha imbunda Marcel Ntirusekanwa wari ushinzwe iyo bariyeri. **Callixte Kalimanzira** yabwiye Marcel Ntirusekanwa ko iyo mbunda yagombaga gukoreshwa mu kwica Abatutsi.
22. Hafi mu mpera za Mata 1994, **Callixte Kalimanzira** yagiye kuri bariyeri yari aho Segiteri ya Muganza n'iya Remera zihana imbibi haca umuhanda ugana i Kirarambogo, ari mu modoka yari itwaye abajandarume. Yabwiye abitsindagira abacungaga iyo bariyeri ko bagombaga kuba bafite intwari bese kandi ko bagombaga kwica Abatutsi. Icyo gihe, **Callixte Kalimanzira** yakubise umuntu urushyi amuziza ko nta ntwari yari afite, undi utari ufite intwari amwinjiza mu modoka ye ku gahato maze akomeza yerekeza ku Gisagara.

23. Hafi y'impera za Mata cyangwa mu ntangiriro za Gicurasi 1994, **Callixte Kalimanzira** yagiye mu nama rusange yabereye ku kibuga cy'umupira w'amaguru cya Nyabisagara muri Komine ya Kibayi. Muri iyo nama, abafashe ijambo barimo na **Callixte Kalimanzira** bashimiye abaturage b'Abahutu umurava bagaragaje mu kugerageza kurimbura Abatutsi.
24. Hafi y'impera za Mata cyangwa mu ntangiriro za Gicurasi 1994, mu minsi mike yakurikiye inama rusange yabereye ku kibuga cy'umupira w'amaguru cya Nyabisagara, ku biro bya Komine ya Kibayi ivugwa haruguru mu gika cya 23, **Callixte Kalimanzira** yagiye ku kigo cy'amashuri abanza cya Ramiko maze ashimira abari mu nama kubera « akazi » bakoze. Yabasabye kandi gukomeza kuba maso no gukomeza kwitwaza intwaro no kwikiza Abatutsi.
25. Muri Gicurasi 1994, **Callixte Kalimanzira** yahagaze kuri bariyeri yari ahitwa Sakindi muri Segiteri ya Kibinzi, maze abwira abantu bayicungaga ko bagomba kwica Abatutsi mu ibanga, bagasenya amazu yabo maze bagatera urutoki mu matongo yabo kugira ngo hatagira ikimenyetso gisigara abanyamahanga bashobora kubona. Yanababwiye ko bagomba kubwira Abatutsi bihishe ko amahoro yagarutse kugira ngo bave mu bwihisho, ayo akaba yari amayeri yo kugira ngo bajye ahagaragara maze babice.
26. Muri Gicurasi 1994, **Callixte Kalimanzira** yageze ahantu hari bariyeri ari mu ikamyoneti (*pick-up*) yari itwaye abasirikare bafite intwaro. Yavuye mu modoka maze ashishikariza abacungaga iyo bariyeri gukomeza kugenzura buri wese no gushakisha umwanzu ari we Umututsi. icyo gihe, **Callixte Kalimanzira** yahamagaye umuntu wari ku ipikipiki barimo bagenzura aho kuri bariyeri ariko indangamuntu ye yanditsemo ko ari Umuhutu, amutwama amuziza ko atitwaje intwaro yo kwica Abatutsi kandi amabwiriza yaratanzwe.
27. Guhera hagati muri Mata kugeza muri Kamena 1994, **Callixte Kalimanzira** yagenzuraga niba buri wese yitwaje intwaro yo kwica Abatutsi kandi ntiyazuyazaga kwiyama

abatazitwaje, ndetse akageza n'aho abakubita anababwira ko ashobora kubafatira ibihano biremereye. Hafi y'impera za Mata cyangwa mu ntangiriro za Gicurasi 1994, **Callixte Kalimanzira** ubwe yakubise Umuhutu ubuhiri amuziza ko atitwaje intwaro yo kwica Abatutsi.

Bikorewe Arusha, Tanzaniya

Ku itariki ya 21 Nyakanga 2005

[Umukono)

Hassan Bubacar Jallow

Porokireri